

veux parler; si vous n'auiez non plus la cognoiffance des Efcritures que nous autres, si Dieu ne vous auoit pas enfeigné dauantage, si vos ancestres ne vous auoiët laissez que le ventre & la guerre comme à nous, peut estre ne feriez vous pas plus gens de bien que nous.

Vne autrefois vn des Peres qui l'auoit enfeigné passant auprès de luy sans luy rien dire, comme en le mesprisant pour auoir perdu sa ferueur, il l'arresta tout court, & luy dit d'une voix haute; Qui pense-tu que soit Pigarſich? (c'est ainſi qu'il se nommoit deuant son baptême) c'est vn gros arbre fortement enraciné dans la terre, crois-tu [124] le ietter à bas tout d'un coup? Donne, donne de grands coups de hache, & continuë long-temps, & en fin tu le renuerferas; il a enuie de tōber, mais il ne peut, ses racines, c'est à dire, ses meschantes habitudes le retiennent malgré qu'il en ait; Ne perds pas courage, tu en viendras à bout.

Au mesme temps que nous le rebutions, il fut sollicité de retourner à ses iongleries; on luy fit des presents, on luy promit que le tout se feroit en secret, cependant quoy il eut vne grande difette des choses qu'on luy presentoit, iamais neantmoins on ne les voulut accepter, ny reprēdre son tambour. En fin nous n'auons pas reconnu qu'il ait perdu la foy nonobstant ses débauches ou ses libertez: Il prioit Dieu tous les iours soir & matin en sa Cabane, & par tout où il se trouuoit il publioit nostre creance sans craindre ses compatriotes. Le respect humain qui fait icy biē du mal, aussi biē qu'en Frāce, ne l'empêche guiere de dire ce qu'il pense; C'est vn esprit prompt, hardy, que la crainte de l'enfer a retenu dans quelque deuoir depuis